

**NO. SOALAN : 78**

**PEMBERITAHUAN PERTANYAAN DEWAN RAKYAT**

**PERTANYAAN :** LISAN

**DARIPADA :** YB. TUAN SU KEONG SIONG  
[ IPOH TIMOR ]

**TARIKH :** 21 MEI 2015

**SOALAN :**

**YB. Tuan Su Keong Siong [ Ipoh Timor ]** minta **MENTERI PELANCONGAN DAN KEBUDAYAAN** menyatakan langkah-langkah yang diambil dan cara-cara bagaimana untuk mempromosi dan memelihara bangunan-bangunan warisan di sekitar Bandar Raya Ipoh.

**JAWAPAN : DATO' SERI MOHAMED NAZRI BIN ABDUL AZIZ**  
**MENTERI PELANCONGAN DAN KEBUDAYAAN**

Tuan Yang di-Pertua,

Dalam usaha memelihara dan melindungi bangunan yang berstatus Warisan dan Warisan Kebangsaan, Kementerian Pelancongan dan Kebudayaan melalui Jabatan Warisan Negara sentiasa memberikan khidmat nasihat teknikal bagi kerja-kerja konservasi, penyelidikan, pengumpulan data dan merekodkan butiran bangunan dalam Buku Daftar Warisan. Selain itu, Jabatan Warisan Negara juga menganjurkan sesi latihan, bengkel, seminar dan sebagainya dari semasa ke semasa bagi meningkatkan kepakaran dan berkongsi pengetahuan dengan pihak yang berkaitan.

Sehingga kini, terdapat sejumlah 21 bangunan telah diisyiharkan sebagai warisan di negeri Perak, yang mana 13 bangunan berstatus Warisan dan 8 bangunan berstatus Warisan Kebangsaan. Daripada jumlah itu, sebanyak tujuh (7) bangunan di sekitar bandar raya Ipoh telah diisyihar sebagai bangunan Warisan. Apabila bangunan-bangunan yang telah diwartakan sebagai warisan, ia telah dilindungi dan termaktub di dalam peruntukan Akta Warisan Kebangsaan 2005 [Akta 645].

Selain itu, Jabatan Warisan Negara juga telah menjalankan kerja-kerja pemuliharaan (konservasi) ke atas bangunan-bangunan yang berkepentingan warisan di negeri Perak. Sebanyak 28 bangunan telah dipulihara di negeri Perak dan daripada jumlah tersebut, sebanyak tiga (3) bangunan berada di sekitar bandar raya Ipoh iaitu Pejabat Pos Lama,

Tokong Paloh dan Masjid Dato' Panglima Kinta. Bangunan-bangunan ini telah dipulihara mengikut Garis Panduan Pemuliharaan Bangunan Warisan yang ditetapkan untuk memanjangkan jangka hayat bangunan.

Sebagai pengiktirafan kepada bangunan-bangunan yang telah diwarta dan dipulihara, Jabatan Warisan Negara telah memasang plak sebagai pemakluman dan promosi kepada khalayak.

Sekian, terima kasih.